



Hans Küng



Josef Imbach

FOTOS LO

Teologs «malobedaivels» obtegnan premis

Il Vatican na stima betg sia atgna buna glied

DA CLAUDIA CADRUVI / ANR

■ **«Nagin donn senza gudogn», sa numna in proverbi rumantsch. Che quest proverbi constat han ils dus teologs svizzers Josef Imbach e Hans Küng senti las ultimas emnas. Omadus han obtegnì premis, ed omadus vegnan sbittads dal Vatican.** Avant trais emnas ha *Josef Imbach* pudì prender encunter il premi «Herbert-Haag per la libertad da la baselgia». Quest premi duai undrar il cumbat dad Imbach per in catolicissem avert.

Imbach è pader franciscan e professer per teologia. 25 onns ha el lavurà a la facultad papala San Bonaventura a Roma. Il 2002 ha cardinal Ratzinger suspendì Imbach pervi da sia instrucziun e cunzunt pervi da sia interpretaziun da las miraclas da Jesus.

Ils reformads stiman Imbach

La chasa editura Patmos ha publictà plirs cudeschs dad Imbach. Quest onn è cumpari il nov cudesch «Der Glaube an die Macht und die Macht des Glaubens». Imbach descriva sias experientschas cun il Vatican che ha tramess el en l'exil en Svizra e scumandà ad el da lavurar sco docent catolic.

Imbach obtegnà uss dentant ina nova patria spiertala: La facultad teologica reformada a Basilea vul dar al teolog in'incumbensa da lavur, almain per ils proxims trais onns. Imbach duai explitgar als students tematicas catolicas controversas sco p. ex. la veneraziun da sontgs e las brevs da perdun.

Il premi «Herbert-Haag» è dotà cun 15 000 francs.

Premis per la pasch

Ina bler pli gronda summa obtegnà *Hans Küng* cun il premi per la pasch Niwano ch'è dotà cun 224 000 francs. Lemna passada è vegnì enconuscent che Küng po prender encunter quest premi ils 11 da matg a Tokio. La fundaziun Niwano undrescha Küng per sias stentas per ina pasch mundiala.

La nominaziun per il premi è vegnida fatga da radund 1000 organizaziuns ed intellectuals da tut il mund. Dudesch manaders religius han il davos decidì tgi che obtegnà il premi.

Las enconuschientschas dal teolog catolic sajan indispensablas per ils process da pasch en regions sco en l'Orient central, l'Irak u Sri Lanka, ha l'investg dad Oslo *Gunnar Stalsett* ditg. Stalsett tutga tar il comité dal premi Niwano.

Inscunters tranter las religions

1954 ha Küng gì sia ordinaziun sacerdotala. Il 1979 ha il Vatican scumandà a Küng da docir, vul dir: Privà el da la lubientscha romana d'instrucziun. Küng aveva criticà la curia e dogmas.

Il 1995 ha Küng fundà a l'università a Tübingen l'organizaziun «Weltethos» che perscrutescha e promova inscunters e scolaziuns interculturalas ed interreligiusas. Il premi Niwano stat en stretg connex cun questa fundaziun.

Küng deriva da Sursee en il chantun Lucerna.